

丁文誠公奏稿

丁文誠公奏稿

卷之二十二 目錄

覆陳川省辦理盜案請免解審摺

光緒七年十二月十四日

擬纂四川鹽法志片

同日

遵旨查覆劉長佑參款摺

光緒八年正月二十三日

拏獲岩番分別嚴辦片

同日

漢奸句引邊夷滋事漁利分別參辦片

光緒八年正月二十八日

保舉華聯輝片

光緒八年正月二十九日

委夏旨接辦滇黔邊官運鹽務片

光緒八年三月二十九日

黔省獨山荔波仍歸川省運鹽行銷摺

光緒八年四月三十日

奏報唐炯起程日期並陳管見摺

光緒八年五月初四日

四川鹽法志成書恭呈

御覽摺

五月五日

川鹽濟楚未能驟停摺光緒八年五月二十四日

官運鹽務帑本還清餘款分別存留備撥摺光緒八年五月二十九日

勦辦岩番大道肅清片

同日

夔關溢解稅銀不爲定額片

光緒八年六月三十日

解部減成減平等款留川備撥摺

光緒八年八月三十日

松潘等處短收餘茶息銀情形片

光緒八年九月三十日

夔關應解督署公費照舊留支片

光緒八年十二月初六日

倣照晉省清查庫款片

光緒九年正月二十九日

覆陳川省辦理盜案請免解審摺

光緒七年十二月十四日

奏爲遵

旨議將盜犯仍請就地正法免其解審恭摺具奏仰祈

聖鑒事竊

臣於光緒七年九月二十四日准刑部咨光緒

七年七月二十日內閣奉

上諭御史胡隆洵奏請將盜案仍照舊例分別首從辦理一摺著刑部議奏欽此經部議請將就地正法章程先行停止請

旨飭下各省督撫將軍都統府尹體察情形將夥衆持械強劫案件仍照成例解由該管上司覆勘分別題奏不得先行正法迅速妥議具奏等因當經臣欽飭臬司遵照確

切體察地方情形妥議去後茲據署按察使崇綱詳查川
省幅員遼闊鄉閒戶口並非聚族而居匪徒最易窺伺是
以報劫之案甲於他省且道路遙遠解省招審近則百里
至數百里遠或千數百里二千餘里每案人犯多則十餘
人少亦五六人不等長途押解疏脫堪虞兵役既多解費
更鉅各犯自知所犯必死一經解省翻易原供以冀苟延
殘喘輾轉行查提貨動輒經年累月案始了結事主畏受
拖累每多隱忍不報州縣解費難賠亦必相率諱匿遂至
匪徒愈肆盜賊橫行不得已於咸豐三年變通辦理奏明
就地正法以靖地方非盡因軍興始用重典自定章以來
凡各屬稟獲盜犯或由本府親提或委員前往會審如有

犯供游移賊證不確則暫行監禁俟拏獲夥犯再行訊辦
果係贓證確鑿始稟請就地正法核明辦理不爲不慎茲
奉

諭旨以御史胡隆潤具奏請復盜案舊例經部議請停止
就地正法飭令妥議詳辦竊思川省自辦理就地正法以
來已歷年所盜案尚未盡絕一旦改歸舊例照常招解則
拖累煩費勢所不免誠恐地方官力難賠累諱飾消弭迨
發覺嚴參地方業已受害殊非除暴安良辟以止辟之意
惟刑部議請停止就地正法以各省辦理未能畫一竟有
地方官拏獲盜犯徑行處決始行詳報其中誠難保無規
避處分藉盜銷案自應仰體

朝廷寬大之仁格外慎重以恤民命體察情形籌商再四照常招解實多窒礙惟有於委審之中再加詳慎庶免流弊擬請嗣後凡遇州縣報獲盜犯如係道府同城卽飭該管道府就近親提審訊如非同城而距省近者由省遴委道府大員遣者卽酌委本管上司或鄰封州縣前往提訊果係贓證確鑿情無可疑仍稟請在本地正法俾已犯者不至久羈囹圄另生他變未犯者亦得觸目警心稍知畏懼且案經委員提訊卽與解省招審無異遇有翻供狡展就近傳質亦甚便捷該委員旣無承緝之責奉委審辦民命攸關斷不敢遷就迴護自取咎戾庶於慎重人命之中仍寓懲創匪類之意等情請奏前來臣復就川省現在情

形細加查核覺寬嚴既貴因時而情法尤宜允當川中地
密民稠人心浮動咽匪會匪梟匪實繁有徒近又加以游
勇散練動多旬聚盜劫之案層出不窮臣到任後復屢飭

嚴拏並妥委營勇隨地隨時會同地方文武嚴查懲辦而
盜風仍未盡息足見治蜀宜嚴實非虛語該署臬司議請
照前就地正法免其解審實係因地制宜起見合無仰懇
天恩俯念川省盜案過繁礙難招解准如該署臬司所議
以後州縣報獲盜犯分別是否與道府同城及距省遠近
酌量委員提審如贓證確鑿仍行稟請就地正法以昭炯
戒而省擾累所有遵

旨核議緣由是否有當理合恭摺具奏伏乞

皇太后

皇上聖鑒飭部核覆施行謹

奏

擬纂四川鹽法志片

光緒七年十二月十四日

再查各鹽務省分均有

欽頒鹽法志以資遵守定制昭然凡在官商竈戶無不奉行維謹罔敢逾越以干刑章是以各省鹽務弊竇恒少非實在商疲竈困

國家課稅無敢或虧且商竈或至虧課而部頒引張均係存庫在官在商均無敢私發私領一引從未有引張發出百數十萬之多而課羨亦虧至百數十萬之鉅駭人聽聞轉晏然自以爲得計如川省之昏瞞極甚者也臣嘗推求其故固由官商之敢於貪詐然亦因鹽務初辦之時雖有成法可循究未經定爲志乘頒發通行以資準則是以官

商均恃其無籍可考相率營私任意舞弊只知肥己而不
知病

國病民迨有人從而矯正之彼則冥然悍然不自知其身
之罹於法網也臣自創辦官運後將鹽務一切積弊委員
確查清理迄今綱紀秩然百弊略盡然事久則變不可不
防因擬爲久遠遵守之計與鹽茶道崧蕃建昌道唐炯等
悉心商酌稽考成法仰稟

宸謨仿之各省之成規準以川省之情勢遠搜近考擬輯
鹽法志一書期爲四川省日後不易之定則容俟纂輯成
編敬謹繕寫恭呈

御覽飭部覈議覆候

欽定頒發川省遵守庶後來辦理者確有率循不敢稍萌
貪詐之弊是亦考鑑之一端也所有擬纂川省鹽法志恭
進緣由謹先附片具陳伏乞

聖鑒訓示謹

奏

遵旨查覆劉長佑參款摺

光緒八年正月二十三日

奏爲遵

旨確查雲貴督臣劉長佑吸煙廢事各情形據實具陳恭

署印

聖鑒事竊臣於光緒七年十一月二十三日欽奉

上諭有人奏雲貴總督劉長佑吸食鴉片有年莅任以來泄泄沓沓溺於嗜好暮氣漸深難免貽憂覆餗等語著丁寶楨確切訪查據實具奏毋稍徇隱將此諭令知之欽此當卽欽遵密派委員候補知府張世康前往慎密訪查據實稟復茲據張世康稟稱該員前赴雲南由滇邊至省城均係改裝易服不露形迹於經過各處遇有紳民人等或

借地方中他人他事相與閒論因漸次詢及雲貴總督作
官情狀據該省紳民均稱總督劉長佑自到雲南以來清
正自持並未聞有吸煙之事其該省自軍興後政務營務
敗壞不堪迨軍務平定而文武紀綱仍復不振地方應辦
公事亦多廢弛總督劉長佑到任設法整理數年之間文
武官吏始就範圍地方公事亦漸次興復各處伏匪辦理
亦甚嚴速滇中士民甚爲感戴至詢其辦事如何則稱總
督劉長佑人甚勤謹年逾六十又前在軍營帶勇多年積
受寒溼身體不時疼痛然每日公事仍照常辦理惟於尋
常官員晉謁遇有無關公事稟陳者常不接見此外實別
無可議此訪之城鄉紳民衆口僉同應卽據實密稟以憑

察核等語臣查督臣劉長佑吸食鴉片一事臣前在山東

時該督在直隸總督任內曾與之共辦東昌宋景詩軍務
彼此營壘相接每日均有籌商戰攻事宜朝夕過從無虛
日並未見該督有吸煙形色卽其營中文武將弁亦從無
言及該督吸煙者惟臣營中有將官從前曾隨該督軍營

帶勇者

臣當時每問及該督在營管束勇丁及臨敵打仗

情形據言該督由湖南至江西各省勦賊甚爲勇往耐勞
後又調赴廣西防勦因煙瘴甚大該督前在江西營中身
受寒溼過重至廣西煙瘴之地遂患腹泄日久不愈其時
營中難覓醫藥多有謂鴉片可除寒止泄者該督以軍營
勞苦久泄難支遂信其言每至夜吸食數口冀以療病嗣

服之數月病果痊愈隨卽禁絕不食今已多年等語又現
任四川布政使鹿傳霖前在廣西廣東均與該督共事日
久臣密加訪問亦云該督從不聞有吸煙情事臣以今昔

所聞證之張世康密訪似該督吸煙之事雖不爲無因然
人但知其昔年軍營治病之事而其病愈後之禁絕或不
得而知也至該督在滇泄泄沓沓溺於嗜好一節查滇省
與川省三面毗連多係夷地邊境每多繆轄之事隨時皆
須會辦臣到川後與該督交涉事件咨函往返商辦極多
從無延擱又川省應協滇餉滇省派委提餉之員每月一
至卽川省官幕及在川貿易者絡繹不絕臣於未經奉
諭之先每於滇省委員及在川官幕人等謁見詢及該督

辦事精神何如及起居服食何如均稱該督嚴絕餽送辦事樸勤整飭地方亦頗盡力紳民均多感戴是該督之泄泄沓沓溺於嗜好實亦無迹可指至該督之清正持躬在山東時已親覩而深佩之嗣該督前赴雲南任所道經黔省沿途弊絕風清實爲從來所僅見此又不敢稍爲訾議者也茲欽奉

明諭飭臣訪查具奏謹將委員所訪與臣親訪之雲南委員及在川官紳並參以臣從前所聞見實不敢一毫虛飾至現在疆臣中如劉長佑之廉正不苟徇屬難得應請朝廷加意保全以期共濟拳拳愚衷合併附陳謹恭摺由驛四百里具奏伏乞

皇太后

皇上聖鑒訓示謹

奏

拏獲岩番分別嚴辦片光緒八年正月二十三日

再三岩野番劫殺洋人一案前經

臣寶楨會同前署成都

將軍

臣

托克湍附片具奏欽奉

上諭野番肆行劫殺實屬兇頑著丁寶楨托克湍督飭派出官兵並嚴檄該地方等務將滋事首夥各兇番剋日拏獲追贓給領盡法懲辦不准稍涉遲延致洋人有所藉口別生枝節等因欽此當經轉行該糧務委員等一體欽遵辦理去後並隨卽飭令勒限嚴緝嗣成都將軍宗室

臣岐

元到任後又經會同嚴札飭催迅速妥辦旋據委員知州楊鞏打箭爐廳同知李忠清巴塘糧務委員嵇志文稟稱前經拏獲夾壩工布曲批策珠二名並起獲原贓騾馬等

件給洋人認明承領訊據工布曲批供稱是夜行劫有丁
林寺喇嘛在內夥同搶劫當又設法將喇嘛降巴納小殲
熱根堆二名獲案提同工布曲批等質訊明確供認不諱
並據隨同司鐸梅玉林之雇工聞天順等認係當時爲首
兇犯確切無疑雖餘匪在逃未獲而該四犯旣據供證確
鑿自應照章懲辦惟巴塘地方全係土番獲犯並無監卡
可禁若令久稽顯戮不惟恐滋事端在洋人亦必藉口逞
延別生枝節應請將情罪重大之工布曲批殲熱根堆二
犯先行正法以昭炯戒其策珠降巴納小二犯卽押回拘
禁打箭爐廳待質一俟續獲有犯再行訊辦庶免狡猾所
劫各贓除起獲外據該教堂估計應賠銀一千九百三十

五兩七錢一分惟此案雖係岩匪爲首而喜松工僧俗竟有多名在內夥劫又該處甲臻烏金澤旺本係岩人兩土司膽敢派令充當甲臻以致內向外結出此重案是該巴塘正副土司與丁林寺勘布約束不嚴均難辭責所有前項贓銀應飭令巴塘正副土司暨丁林寺勘布分別賠繳以爲約束不嚴者戒該教主畢天榮見如此辦理兇犯旣經正法失贓亦復有著心極悅服毫無異議當經領銀出具洋字圖記了案切結以憑結案等情具報前來臣等查該員等辦理此案甚爲妥速並取具該教主畢天榮了案切結尤爲結實可靠惟三岩野番頻年攔搶行商上年並拒斃駐藏幫辦大臣維慶引馬人夫實屬兇頑此次又復

劫殺洋人雖畢天榮自知理屈不與爲難俾得速爲結案而該匪等迭次越境搶劫滋事若不將此案逸匪悉數拏獲嚴行究辦實無以示儆將來現經批飭該糧員嵇志文督飭該土司隨時購綫設法密捕務將在逃餘匪上緊弋獲盡法懲辦庶野匪稍知斂迹大道可期通暢仰副

聖主懷柔遠人綏靖邊隅之至意除將教主畢天榮所具洋字圖記了案切結咨送總理各國事務衙門存案備查暨咨部外所有拏獲三岩野番劫殺洋人兇匪分別正法監禁案已了結緣由謹會同成都將軍宗室臣岐元附片

具奏伏乞

聖鑒訓示謹

奏

漢奸句引邊夷滋事漁利分別參辦片

光緒八年正月二十一日

再查川省之峩邊雷波馬邊越雋及松潘理番龍安暨甯遠府各屬概係夷巢縱橫不下數千里其間大小各夷約計數百支內有黑夷白夷之分種類極繁不相統攝互爭雄長所居夷巢均係崇山峻嶺密箐深林人迹難到又近接涼山尤極險遠該夷本屬犬羊成性而所處之地亦復崎嶇是以川省歷來無一二年不辦理夷務者職此之固然臣到川後詳察情形始知該夷之所以易於出巢者固屬犬羊之性反復無常然亦多由於漢奸所致緣漢奸居心狡詐當夷人安靖之時則陰構其出擾從中隨同搶掠漢民及至夷人搶劫不休派兵勦辦則又從中倚勢焚擗

臣

夷人表裏爲奸坐獲漁人之利深惡此弊屢嚴飭各邊地廳營密行查辦並爲之定立規條冀除錮習而安邊圉並節年將疏玩之峩邊通判楊銘雷波通判趙席珍等參革馬邊廳營各員撤省查辦惟積弊過深一時實難驟除前據樂山縣知縣張明毅稟報有峩邊黑夷牛牛等帶同白夷目瞿木資等前赴樂山求撫自願與馬邊夷支約同保守縣境不令各夷滋擾等情該縣因其來意甚誠妥爲遣回當派有圖勇護送前進詎行至峩邊地界卽有趙山地方團民趙三毛牛率領多人將該夷目等殺斃並將護送團勇毆傷捆縛割取夷首赴峩邊廳請賞該夷聞信後卽糾邀各支夷出巢以圖報復經該縣會同防營嚴密防

禦該夷等始行歸巢等情臣現嚴飭義邊廳通判王桐華
速行查拏趙三毛牛等到案審明治罪以服夷人之心茲
又據署雷波廳通判李中斂會同該廳參將蔣繼榮稟稱
該廳夷人自去歲辦理肅清各支尙屬相安詎於十二月
內忽有庚札勿奇兩支夷或十餘人或數十人不等在於
該廳境不時滋擾經該廳會營查辦適該廳就撫之夷共
二十三支內有二十一支俱已來廳領賞獨庚札勿奇兩
支尙未前來該廳營卽當堂傳訊各支夷目詢以庚札勿
奇何以領賞遲延之故卽據板都支夷甘洛米吐等供係
毛干總傳知令伊等帶領夷人出擾可以從中獲利等情
並據該夷等出具切結存案查毛干總卽毛廷魁前署三

稜岡于總復保升守備都司乃竟暗向夷匪教令出巢滋
事似此貪奸武職亟應參革提省確訊治罪應請

旨將候補都司毛廷魁卽行革職以憑嚴行審辦用昭炯
戒而安夷情至各該邊夷愚頑無知性情反覆而各該廳
又多奸民句引臣覆經派委明幹之員前往會同各防營

密爲稽查認真巡哨以資周密所有川省各邊夷務近多

漢奸句引滋事漁利並請

旨將通夷武職斥革審辦及委員前往巡查各情謹會同
成都將軍宗室臣岐元附片具陳伏乞

聖鑒訓示謹

奏

保舉華聯輝片 光緒八年正月二十九日

再官運鹽務本屆奏銷已及四綱引岸日疏課釐增旺已定成規此皆上稟

宸謨下資羣力幸克臻此然臣以爲

國家之至計貴有治法尤貴有治人回憶官運創辦之初凡在中飽之徒無不危言震恐百計阻撓又以其時成本過紬事事掣肘辦理殊屬爲難臣與建昌道唐炯互相勉策以事關

國計民生甚大惟當竭誠圖維利害均可弗計唐炯以事屬艱鉅辦理必須得人查有貴州舉人揀選知縣華聯輝才智閑達爲守最優若得之參助必能多所規畫底於有

成臣卽函致來蜀與之諮詢一切華聯輝初謂臣曰川省

鹽務名爲不及兩淮然辦理覈實亦兩淮之次奈攘其利

者已百餘年遂至毀壞不可收拾今欲開辦官運爲疏引

裕課之計非專意於恤商便民不爲功臣以引岸甚繁成

本甚絀呼應不靈將若之何華聯輝謂成本甚絀當可設

法惟口岸甚多商情必通而後根基可固竊願親赴各岸

一行審量情勢再爲定奪臣當促令前往於所到各岸卽

與各商開誠布公講求現在官運辦法而又與之區畫領

鹽繳本各事宜計不及一月各岸商號之繳本領鹽者已

不下四十餘萬唐炯見事機已順卽由此推廣而行故官

運一辦便有成局此後則剔弊除奸逐漸展布事事求實

遂致年勝一年今則規模大定但使恪守舊章即可安坐而理是川省鹽務之振興實華聯輝之力爲最也臣竊維大學言平天下之道首重絜矩繼重理財誠以聚人曰財古今不易之理現值時局憂貧理財尤亟然理財若出於培克聚斂是以利爲利實亦不足以利

國家華聯輝初謂臣以恤商便民爲主是根本已立宜其以後諸事皆迎刃而解也臣數年來詳查華聯輝操行正大識見闊遠才力堅卓條理精詳而其公忠自矢清白盟心在局數年不受一毫薪水尤爲近今罕見當茲需賢孔亟似此拔出之才儻蒙

聖明採擇破格錄用必能隨處適宜有所建樹決不致上

負

任使

臣爲

宵旰求賢孔殷而人才又實難得茲既有其才臣又確有所見不敢自匿謹附片具奏伏乞

聖鑒訓示謹

奏

委夏旨接辦滇黔邊官運鹽務片

光緒八年三月二十
九日

再臣准軍機大臣字寄光緒八年二月二十八日奉

上諭唐炯現已簡放雲南布政使其四川官運鹽務向係
唐炯一手經理頗著成效現須交卸赴任所有該局事務
關繫緊要卽著丁寶楨遴選妥員奏明委辦並嚴飭各該
員等認真經理毋任日久廢弛將此諭令知之欽此臣跪
聆之餘仰見

聖主慎重鹽務至意當卽欽遵督同唐炯暨藩司鹿傳霖
鹽茶道崧蕃等熟商接手之員以期恪守成規妥協辦理
俾鹽務日增暢旺查該局地廣事繁其間調劑商民籌撥
餉課督銷引運稽核征收事事均關緊要非同他局可比

現在人才難得遴委實非易易而藩司鹿傳霖鹽茶道崧
蕃又各有本署應辦公事萬難兼顧茲查有四川候補道
夏旨操守廉正才敏心精前到川時臣查其結實可靠曾
經飭派該道在鹽局幫同唐炯經理各廠暨各分局事宜
藉資歷練該道鉅細必親耐勞任怨極爲得力現值官運
局接辦需人臣查夏旨允堪勝任第該道前因丁憂回籍
終制刻計五月內應行起復回川除由臣咨明湖南撫臣
查明該道已經服闋卽給咨飭其趕緊回川接辦局務並
請

勅下該撫臣查照母任遐邇於局務大有裨益謹附片具
奏伏乞

聖鑒訓示謹

奏

黔省獨山荔波仍歸川省運鹽行銷摺光緒八年四月三十日

奏爲查明黔省獨山州荔波縣實係川鹽引地應仍歸川省運鹽行銷以符原案恭摺仰祈

聖鑒事竊查黔省獨山荔波等州縣向爲川鹽銷引之地近因粵商恃衆走私引銷疲滯經臣咨請示禁在案旋准

貴州撫

臣林肇元咨轉准廣西撫

臣慶裕咨開查兩廣鹽

法志開載西櫃各埠廣西桂林柳州慶遠思恩泗城平樂梧州潯州南甯太平鎮安等屬府州縣貴州黎平府屬古州在開泰縣境內兼銷永從獨山荔波地方謹按黎平府屬古州係新闢苗疆向無額引雍正十年前撫臣金鉉奏請委官運鹽至古州永從丙妹三角埡各地試銷乾隆三

年前督臣鄂彌達奏請招商定額引四封設古州總埠而

以丙妹永從三角里隸焉八年雲貴督臣張廣泗咨准黔

之荔波縣舊隸粵西慶遠府原食粵鹽今改隸黔省粵鹽

不至川鹽價昂民苦淡食今古州埠商人添領額外餘鹽
或撥難銷埠引鹽一封運至古州聽該處苗民自赴買銷

以上連古州兼銷之永從獨山荔波共六十廳州縣均歸

西櫃等語今准來咨黔省荔波獨山等處向爲川鹽行銷

之地核與兩廣鹽法志載永從獨山荔波均歸西櫃之條

未符查粵鹽頻年滯銷稅課缺額正在招商設法整頓行

鹽之際引地實爲餽課攸關未可稍涉歧誤咨請核辦等

因當經轉行去後茲據黔滇官運總局道員唐炯鹽茶道

崧蕃詳查兩廣鹽法志轉運部疆界門內載自謹按黎平府古州係新開苗疆起至聽該處苗民自赴買銷止均與來咨所引相符惟原文並無以上連古州兼銷之永從獨山荔波共六十廳州縣均歸西櫃三十四字又查粵鹽行銷各省運道總圖內只列黎平古州並無獨山荔波又查前廣西撫臣金鉛兩廣督臣鄂彌達兩次奏內均無獨山荔波字樣卽以前雲貴督臣張廣泗原奏而論亦祇稱運至古州聽荔波苗民自赴買銷並非令粵商運往獨荔售銷况部頒鹽引內載都勻府與貴州各府一例則獨山荔波在其內而廣西撫臣金鉛原奏亦明有都勻爲川鹽引地之語此獨山荔波從前實爲川鹽引地之確證也如

謂兩廣鹽法志係乾隆年間所修以後或有變通則宜以最後之案爲斷四川於道光三十年經前督

臣

徐澤醇奏

請委員帶商赴黔將行鹽引岸逐一清釐分疆畫界以杜爭執造冊送部覆准通飭遵照重刊引根引紙明載獨山荔波在內有案可稽此又獨山荔波現在實爲川鹽引地之確證也至三角至係獨山州一隅之地兩廣鹽法志內雖有隸古州埠一語不得以一隅而概一州並牽及荔波亦爲粵鹽引地今欲禁止川商不令販鹽赴獨荔行銷則商人手執引紙尚不足據誰肯認銷於川省鹽法大有關繫不但僅失獨荔引岸等情詳請奏咨前來

臣

覆查無異

相應請

旨勅下廣西撫臣查照原案嚴禁粵商恃衆走私攬塞獨
山荔波川鹽引地俾清界限以肅鹹綱庶商人不致疑畏
引岸不致混淆實於鹽法官運兩有裨益除分咨外理合
恭摺具陳伏乞

皇太后

皇上聖鑒訓示謹

奏

奏報唐炯起程日期並陳管見摺光緒八年五月初四日

奏爲遵

旨飭催雲南藩司赴任奏明起程日期並因探聞滇邊情形敬陳管見恭摺仰祈

聖鑒事竊臣承准軍機大臣字寄光緒八年三月二十四

日奉

上諭前有旨將唐炯補授雲南布政使著丁寶楨傳知該藩司迅速馳赴新任無庸來京請訓並著將起程日期奏聞將此由五百里諭令知之欽此欽遵轉行該藩司飭催迅速起程茲據唐炯稟稱已將經手四川官運鹽務清釐交代清楚定於五月初七日起程赴任呈請代奏前來惟

臣前聞法國與越南構釁稱兵滇粵兩省邊境毗連現均增兵籌餉防務喫重日來又欽奉

諭旨令由四川官運局每年撥銀二十萬兩協濟滇省以資募勇之費等因當經隨時籌計此次

朝廷飭催唐炯赴滇任事是否注意於此

臣未得知惟近

復得之傳聞均稱法國已取越南東京並有添調兵船併吞越南之說邊防十分緊要又現有紛紛議論或謂宜練軍自衛者或謂宜出境略地者傳聞不一未能得其確實然竊謂練軍之說在乂安無事之日尙宜思患預防况勁敵強鄰眈眈窺伺兵法云無恃其不來恃我有以待之自應厚集兵力以固藩籬斯爲正辦至出境略地則有關中

外大局稍一輕舉所繫匪輕臣不敢安於緘默敬爲我

皇太后

皇上詳陳之查爲略地之議者不過謂得尺則尺得寸則寸拓之可以固吾圉留之仍以裨越南立言似正爲謀似遠而不知有不可行者夫兵出有名師直爲壯法國恃其貪黷旣取越南東京其屬地亦必多所侵占今我師將略其已侵之地乎抑略其未侵之地乎如略其已侵之地彼方據之於前我卽奪之於後法國豈能甘心必以加越之兵移而向我此時不與之戰則勢必不能然與之戰則無論勝負構怨方深一不可也如略其未侵之地該兩國不知我兵出何意在法必謂我袒護屬國併力相圖在越南

且謂我乘彼之危坐收厚利卽徇定其地而孤軍虛懸豈能久守儻不旋踵而復失徒損

國威於事仍無所補一不可也查自中外交涉以來各國中最強盛者莫如俄最橫暴者莫如法加意防維猶虞乘隙而動矧復貽以口實啓其釁端決裂之情不待再計

議者特未置身局中統籌大勢深思熟慮且爲目前計臣愚以爲排難解紛事原往古而交鄰字小此時甚重然遽

由

朝廷派員前往宣

諭殊覺

國體不尊亦恐難以轉圜應請

皇上密飭滇粵督撫臣一面照會法國統兵領事等官揀派明幹大員前往詢其稱兵之由責以大義示以公法謂越南如果開罪彼國自當奏

聞請飭令該國謝罪取和如並未啓釁無故加兵則是彼國顯背條約不惟失和好於中國抑且失信義於泰西殊爲彼國不取以此敷陳剴切據理力爭則在各省本有救災恤鄰之誼而於邦交亦得講信修睦之體且

朝廷可得以坐觀其勢徐爲布置卽法人亦見我各省同聲義舉必難窺我淺深一面仍調集各省大軍出屯邊境以壯聲勢如此辦理或使法人知難而退還其侵地旣於全局無損而越南亦得保有疆土翼戴

皇仁如果法國恃強逞貪必欲兼併至不得已則猶有爲
越南保全之一策緣臣聞從前髮逆自撲滅後餘黨散入
越南尙以萬數千計率皆剽掠爲生越南深受其害而無
如何並探聞上年法國兵加越南該國曾資以退敵馘其
上將始克保全後因乏餉旋復散而爲盜此等不逞之徒
尤恐法人鑒於前轍陰爲收集以供彼用則不獨爲越南
目前大患實亦中國日後隱憂臣愚以爲莫如

密諭滇粵督撫臣慎選機變可靠之員知會越南陰爲設
法招撫收輯令其捍禦法兵惟越南被兵有日一切軍儲
器械糧餉或有不敷應由滇粵各省酌籌明爲撫恤越南
暗則資其接濟俾其爲法國別樹一敵儻該匪幸而獲勝

越南旣感代籌之

德而我並不居保護之名法國亦無以藉口設此類竟爲法國所殲亦隱爲中國除一大患驅狼鬪虎似屬一舉兩得然臣竊查洋人用兵多尙整齊若不得已而與之戰自當避其所長攻其所短乃能得力此起匪衆素習野戰果能收爲我用與法相持深合以散擊整之法而又有越南之兵以斷其後抑亦法人之一厄其勝負實未可逆料也至滇粵各省仍須力圖自強切實練兵分布要隘慎固邊防乘機以觀其變而爲之應或爲萬全之道事關天下大局必須通籌遠慮謀定後動應請

勅下軍機大臣並總理各國衙門會同妥議籌辦臣無任

懇款之至唐炯子身赴任時艱在卽察其忠勇沈毅膽識俱優必可有爲惟慮藩司責專籌餉兵事非其所屬雖滇省本有防軍近日復加招募然一切非藩司所得自主亦恐呼應不靈動形掣肘查該藩司舊部安定五營分屯川境現在川省稍爲靜謐可否令其酌帶兩營赴滇無事則令遊巡邊徼藉壯聲威有事則可供調遣聯絡各營從容部署較倉卒招募者倍爲得力如蒙

俞允

臣俟奉到

批諭後卽知會該司並派員率帶前往交替似於滇省邊防不無裨益所有遵

旨飭催雲南藩司赴任起程日期並因探聞滇事敬陳管

見緣由是否有當理合由驛四百里具奏伏乞

皇太后

皇上聖鑒訓示謹

奏

四川鹽法志成書恭呈

御覽摺

光緒八年五月十五日

奏爲纂輯四川鹽法志成書敬謹繕冊恭呈

御覽仰祈

聖鑒事竊

臣前以四川鹽務爲川省第一大政因向無鹽

法志頒發遵行以致官吏商民恃無遵守任意紊亂百弊
叢生敗壞至於不可收拾是以奏明纂輯鹽法志一書俾

資率循欽奉

諭旨允准伏查鹽法志一書從前雍正二年戶部以長蘆
山東鹽法志纂輯告成具題請

旨勅下淮浙兩廣河東福建四川雲南等管鹽督撫一體
遵照纂輯奉

旨依議欽此欽遵通行在案查鹽法志實爲鹽務省分必

不可少之書經

臣

督同前總辦官運局新授雲南藩司唐

炯暨四川鹽茶道崧蕃等悉心考究稽古準今編輯成書

現已完竣謹繕具黃冊咨由軍機處恭呈

御覽仰懇

勅部覈明覆議具奏候

旨定奪勅下以憑欽遵刊發各屬敬謹遵守用肅謹

繕摺具陳伏乞

皇太后

皇上聖鑒訓示謹

奏

川鹽濟楚未能驟停摺

光緒八年五月二十日

奏爲遵

旨查明川鹽濟楚未能驟停尙須展緩辦理以順輿情而
維

國計恭摺覆陳仰祈

聖鑒事竊臣於光緒八年五月初九日接准軍機大臣字

寄光緒八年四月二十七日奉

上諭前據左宗棠奏淮鹽擬加引票當以增引恐致滯銷
諭令詳議具奏候旨遵行旋據左宗棠奏籌復楚岸派員
辦理官運撥營前往巡緝及淮北加引各情已諭令戶部
妥議具奏茲據彭祖賢奏兩淮議禁濟楚川鹽有關鄂省

饑源客軍緝私室礙難行請飭暫循舊章各摺片據稱鄂省出款半取給於川鹽釐稅若禁川復淮則饑源大減此時未與四川議定停運限期先行設卡堵截恐無以取信於民恩施等州縣例應行銷川鹽不能概行禁絕監利縣已到川鹽限三箇月銷盡室礙殊多等語川鹽濟楚行之已久此時議復淮引固爲規復舊制起見惟川鹽能否卽行停運鄂省饑源有無關礙必須通盤籌畫從長計議且將來如果復淮亦必須酌定期限曉諭商民行之以漸方不致激生事端此事惟視民生國計所宜或淮或川朝廷並無成見總須妥慎辦理以期商民相安著左宗棠涂宗瀛丁寶楨彭祖賢悉心會商妥議具奏候旨遵行現在仍

著循舊辦理川鹽行銷楚岸尙未能剋期禁止遽派勇營前往恐致民閒疑懼著左宗棠飭所派親軍二營暫行停止赴鄂將此由五百里各諭令知之欽此欽遵寄信前來臣跪讀之下仰見

聖主平均天下一視同仁莫名欽感伏查川鹽濟楚從前係通行鄂省自軍務肅清後建議禁川復淮經鄂川各督撫以川鹽驟禁勢有難行乃議分鄂省安襄鄖荆宜五府荊門一州並湘省澧州一州爲川鹽行銷之岸此外不得攬越議定之後行之歷有年所然禁川復淮之說屢欲照辦迭經部臣請

旨飭下江鄂湘川四省會議妥籌各省往復咨商均以事

多窒礙尙須從緩辦理方免貽誤等情具奏各在案竊禁川之議臣前在山東巡撫任內卽熟聞之以爲復淮本一

國家大計不容緩圖迄到川後始知川鹽濟楚行之過久百姓添增井竈改煎鍋口已成積重之勢一旦遽議禁川則鹽無出路勢必扞格難行復查明滇黔本爲川鹽引地特因兵燹口岸荒廢亟應設法規復節次開通俾川引自有銷路方可徐圖復淮乃爲善辦是以奏明先行開辦黔邊官運次及滇邊四五年來辦理漸有成效而楚省五府二州淮岸迄未能復則以商情尙有不順一時未可驟圖非敢稍分畛域置淮岸於不顧也今兩江督臣遽議全行停止濟楚川鹽未免操之過急查酌情形實有難以遽行

者請爲我

皇太后

皇上縷晰陳之川省井竈產鹽行銷本省及滇黔兩邊向煎整塊巴鹽並無散粒花鹽自鄂省始議借銷川鹽其時川省歷任督臣深恐引岸混淆且慮楚省食慣花鹽巴鹽不便行銷未肯照行嗣因鄂省奏咨不已不得不爲委曲興辦以顧全局乃多方勸諭令民間多開井眼仿照兩淮煎曬花鹽將鍋口酌改並增添大半復招徠行商湊集貲本領引行銷極力圖維始有成局維時全楚均食川鹽岸廣銷暢商情極形踴躍富順縣廠新開之井二百餘眼改燒鹽鍋二千餘口濟楚行商不下百數十家鄂省始則借

之以濟民食繼乃借之以抽釐助饑歲收百數十萬兩饑
源亦由此而裕迨軍事大定淮綱復興卽有禁川之舉初
議分成搭配繼議畫界分銷又復加重釐金川省屢致虧
折而猶不至歇業滋事者則以歷年已久商欠民欠以及
存曠在鄂之鹽通計成本不下數百萬一旦禁止則成本
無從歸還惟恃有此五府二州之一綫銷路以爲生活也
自臣開辦官運滇黔引路雖漸通暢奈該兩省從前本係
瘠區自兵燹後村落成墟近雖肅清數年而流亡戶口復
還者尚不及十之三四食鹽之人旣少銷鹽之路不寬且
該兩省惟食巴鹽不食花鹽尤難勉強遽舉此濟楚八九
千引之花鹽銷歸烏有計自官運辦後每年設法勸諭改

鍋煎巴舌敝骨焦應此卒寡似非一二年間所能驟致若必決然辦理勢必塞井夷竈抑勒從事從前川民一聞禁川復淮之說輒環聚泣訴人心皇皇必俟定議循舊辦理始克安定如常本年三月臣甫經接到兩江督臣咨商停止

濟楚當經據實咨覆乃愚民無知聞淮軍已到鄂省設卡堵截卽謂禁川事在必行人情驚懼異常旋據自流井閩廠商民並濟楚運商大生厚等一百數十餘家聯名呈訴井商則謂工艱貲鉅每鑿一井多者費銀十餘萬兩少者亦數萬兩核計近年產鹽之數除運銷滇黔及本省計岸食鹽外每年尙餘鹽一萬餘引今若停運驟加封禁是商等以二三十年之舊業一臥廢棄工本憑何取償運商

則謂溪貴運鹽到楚發販多係零星賒欠該商等承運近三十年所放楚省商販民欠各帳項每家或數百數千兩或萬餘兩或二三萬兩總共不下五六百萬兩非七八年中不能收回而存積在鄂之鹽又不下二三百萬今若停運各債憑何收取各鹽如何出售借本無歸破產傾家生機頓絕而尤難爲之解說者則僉謂開井運鹽從前皆係奉文應募並非私辦卽令停止亦應曲體民情寬限數年俾商等資本鹽劖漸次收回售盡何以不爲安頓遽行禁止蚩蚩之氓衆口一辭並謂江蘇蜀省同隸版圖淮商川商同爲赤子

朝廷一視同仁必不稍有厚薄歷陳苦衷哀懇代奏展限

前來平心而論當濟楚之初則招之惟恐不來有復淮之議復遏之使必立止揆諸情理殊屬未安臣實無詞以對此停止濟楚川鹽不能不展緩辦理之實在情形也且臣

自到川後無時不以復淮爲念查從前川鹽運楚包口每包加重至五百餘觔一引行兩引之鹽實計每年已加銷一萬五六千引占擋淮引不下四十餘萬道臣極知淮岸

日久應復應先善自爲謀以免後來掣肘因首將包口改歸舊則每包連皮照舊僅重二百二十六觔暗爲釜底抽薪之法繼以滇黔銷路漸暢復爲奏定限制每月濟楚減爲七八百引以現在行銷而論每年實僅八九千引是明已減去五六千引合之以前行楚包口實已暗減去一萬

二千餘引線前後情形而計明減暗截實較從前川鹽占行淮引減去不下三十二萬道讓還淮岸之計畫不爲

不至地步不爲不寬茲僅餘此九千餘引分銷楚省五府二州似可立復舊制然設使果係川民自爲浸灌臣何難繩之以法無如當日實係百計招徠其曲在我又設使今

日滇黔戶口無異全盛

臣

又何難舉濟楚之鹽導入該兩

省行銷俾各省無所藉口無如兵燹之區生齒凋敝萬分驟難復元鹽勦難覓銷路又况商情趨利稍有虧折卽難勉強若令將數百萬資本化爲烏有尤慮變生意外誠如聖諭必須行之以漸方不致激生事端爲今之計莫如將停滯之議暫不求速俟將川引查照部議再行量爲酌減

每月以六七百引爲率俟數年後滇黔流民招徠漸多川省鹽鍋改煎較順楚商資本藉此展緩漸次稍可收回斯時江省卽不議復淮川省亦自能禁川畫清引岸各歸各地不勞而理較之目前辦理窒礙者難易迥殊且查以前每年川鹽行楚多至三萬餘引今不過四年卽已減爲九千餘引若再緩數年此九千餘引或尙不難禁絕此臣行之有驗者並不敢徒託空談稍涉粉飾至楚省歲收川鹽釐金不僅供本省軍需兼顧別省協撥卽以現在減引而論每年亦不下一百餘萬查楚省五府二州應行淮引十四萬六千餘道以淮鹽章程課釐併計不過九十萬兩而前據署兩湖督臣翁同爵咨稱武漢黃德等府四十三萬

餘引之地竭力緝私並無川鹽浸灌每年所銷不過二十萬引今卽將荆宜鄖安襄荆澧等府州十五萬引地面全歸淮銷照武漢黃德四府現銷引數比較至多不過銷至五六萬引楚省歲入課釐不過三十萬兩該省雖有竹木牙釐歲收亦不過十餘萬兩一旦空此七八十萬現成有著之饑源而取償於虛懸不可必之淮釐能否不致動形支絀上煩

宸廑臣固不能越俎代謀而脣齒相依思慮所及亦不敢不據實直陳應請

勅下部臣妥議施行所有川鹽濟楚現在未能驟停尙須展緩辦理以維大局各情形臣愚昧之見是否有當理合

恭摺由驛五百里具奏伏乞

皇太后

皇上聖鑒謹

奏

官運鹽務帑本還清餘款分別存留備撥摺

光緒八

年五月二十九日

奏爲黔滇官運局帑本還清應將丁戊己庚四綱支存各款留局作爲運本嗣後再將支存之款存儲備撥恭摺仰祈

聖鑒事竊查黔滇官運局自光緒三年開辦後借撥藩庫銀五十萬兩嗣山東解到借款銀八萬兩當由司庫扣收銀七萬七千兩總計官運局祇領到本省東省借撥鹽本銀五十萬三千兩原議分作八年歸還前經奏報在案茲據官運局新授雲南藩司唐炯詳查官運局前借本省東省鹽本銀兩已於光緒四年還過司庫銀六萬兩五年還

過銀十二萬兩七年還過銀十五萬兩本年還過銀九萬
三千兩共計解還過司庫銀四十二萬三千兩又六年還
過東省銀二萬兩七年還過銀二萬兩本年還過銀四萬
兩共計解還過東省銀八萬兩所有官運局原借本省東
省銀五十萬三千兩均已悉數還清至丁戊己庚四綱征
收稅羨截釐各正款銀兩除每年撥解滇黔兩省協餉抵
捐及北洋鐵甲船價總共銀八十六萬四千七百五十兩
外實存銀一百八十九萬四千七百七十七兩九錢零均
經發廠購鹽分運各岸行銷惟查每綱額行邊計各引並
帶銷積引約共計引三萬道每配一引鹽價水腳須一百
數十兩不等以三萬引而計約須銀五百餘萬兩總局鹽

本向係隨發隨收邊岸途遙每年僅可周轉一次計岸則
可周轉二三次通計每綱各岸局所解亦約有五百餘萬
兩足敷購運固可無庸加多實亦不能減少辛巳綱以後
所收正款除撥解滇黔兩省銀二十五萬一千兩奉撥接
濟藏中公費銀一萬二千兩現又奉撥滇餉銀二十萬兩
尙可餘銀二十餘萬兩應請將此款銀一百八十九萬四
千七百七十七兩九錢零永遠存留局中作爲運本嗣後
所收稅羨截釐各款除撥解滇黔兩省外每年支存餘款
應存儲聽候撥用卽自光緒九年爲始按年照辦一綱再
山東解到借款銀八萬兩當由藩庫扣收銀七萬七千兩
仍係在五十萬之內未經列入撥用以免重複牽混等情

詳請奏咨前來

臣

查官運局撥借本省東省帑本原議分

作八年歸還現計四年之間卽將所借原本悉數還清是該局此後卽無官本而鹽局仍須購運以利疏銷所有丁戊己庚四綱征存正雜各款銀一百八十九萬四千七百七十七兩九錢零自應存留在局作爲運本以資購運而裕征收其自本年辛巳綱以後所收稅羨截釐各款應安爲存儲以備指撥而重帑項於鹽務庫儲兩有裨益除飭各委員照章實力經理不准稍有虧挪作弊並咨部外所有官運局還清原借帑項及四綱支存各款存局作爲運本並按年將支存各款驟候撥用各緣由理合恭摺具奏

伏乞

皇太后

皇上聖鑒訓示謹

奏

勦辦岩番大道肅清片

光緒八年五月二十九日

再三岩野番劫殺洋人一案前經

臣寶楨會同臣岐元將

獲犯訊明分別正法監禁取具洋字切結了案緣由附片

具奏欽奉

上諭該部知道欽此當經轉行該糧務委員等一體欽遵
在案查三岩野番頻年攔搶行商上年駐藏幫辦大臣維
慶由川入藏行至大石包該番匪膽敢攔路搶劫殺斃引
馬人夫嗣又將法國司鐸梅玉林殺斃實屬兇頑已極現
雖拏獲兇匪分別正法監禁惟在逃餘匪未獲若稍涉輕
縱殊不足以戢其野心自應將在逃餘匪悉數弋獲盡法
懲辦庶野匪稍知斂迹不至復出滋事隨卽飭令勒限嚴

緝去後茲據糧員嵇志文稟稱該員於辦結教案後親赴竹巴籠地方查看岩番歷年出劫各處將調派泰甯營兵丁逐段駐紮飭令該土司等實力嚴拏比時幫辦大臣維慶亦奏請揀帶漢番官兵馳往查辦已將紫打圍攻該番均有投順之意嗣聞維慶有奉

旨調東當差之信各番又思反覆並派人赴上中兩岩乞援該糧員當卽飛繕漢夷雙文告示遣派熟悉岩境夷人馳往上中兩岩徧貼曉諭各清各界毋得聽人唆弄自罹罪戾自是兩岩番等各懷畏懼不肯助惡該糧員卽飭令前敵速爲進攻並飭後路隨時帶隊入山搜捕該東打岩番猶敢糾合納窪尾角暮洗等族共九百餘人前來紫打

寨前郎隆拉山會戰欲解紫打之圍我兵分路迎擊該番勢力不支四散敗逃我兵乘勝追擊殺死各族二十餘人受傷逃回者不計其數復斃紫打賊首霞朵一名於是紫打寨中男婦均哀哭求饒情願投誠以後不敢劫搶大道迭據擦納寺喇嘛汪根代各族再三懇求該糧員以該番頻年剽掠劫案如林原屬法所不宥但伊等自乾隆年閒搶劫至今歷有案卷可稽從未稍受懲創此次攻克堅巢斬擒首要實足以寒賊膽而快人心除將紫打一村查明不法之家將其房產盡行燒燬田畝分賞良番其餘東打納窪尾角模西卽暮洗宗巴各村概准投誠以免勞師糜費並以族番等狼子野心難保日久不至反覆當飭令兩

土司及擦納喇嘛轉諭該番等各獻有身家之頭目前來巴塘查照越嵩夷卡之例在巴押質儻日後大道稍有搶劫查出係何族夾壩卽惟該族在押人是問押質之人是否可靠責成擦納喇嘛出結具保該番等畏其攻擊均紛紛請降送質許予投誠仍飭令擒獻拒斃引馬人夫及劫殺洋人各逸犯當據宗巴將洋案兇番納雍噶熱布兩犯擒獻該番匪因拒捕格鬪受傷過重未及到營卽因傷身死當將首級知會教堂梟示河干以昭炯戒至前次陣擒之卓奔奪吉訊據供稱曾經在大石包劫掠且與官兵對敵此外尙有劫殺兩案夾壩數人均經該投誠各族許以設法擒獻並先以有身家之人送巴作質俟擒獻夾壩後

再行掉換岩番從此知威感德大道可以暢行地方得以安謐該主教畢天榮見如此辦理逾覺心悅誠服現已於四月二十五六七等日分別將各士兵撤回各遣歸牧所獲各匪俟餘匪解到卽行訊明稟請核辦等情前來

臣查

岩番爲患巴塘已歷百有餘年傷人無數以馳驛大道行旅戒嚴實屬不成事體此次調兵勦辦該糧員嵇志文卽率領官兵實力進攻數月之間奪壘擒渠卒能將百餘年地方大患設法懲創荒外野番均能輸誠向化辦理尙爲妥速並查照越巂夷卡之例飭令該番等各獻頭目在巴押質責成擦納喇嘛出結具保俾免日後復出搶劫辦理尤爲切實現在來往漢夷無不同聲歡慶川藏大道可以

一律肅清堪以仰慰

聖懷除飭該糧員勒令投誠各族將兩案逸匪數人剋期擒獻一體研訊明確按擬究辦並將善後一切事宜妥爲籌辦具報外所有勦辦岩巢現已就撫並獻人押質永不敢再行劫搶川藏大道肅清緣由謹會同成都將軍宗室臣岐元附片具奏伏乞

聖鑒訓示謹

奏

夔關溢解稅銀不爲定額片

光緒八年六月三十日

再查夔州府經徵關稅前因驗放洋票免稅日多短徵日

鉅經

臣奏明請以宜漢兩關收數劃抵嗣經部議准自光

緒六年爲始由宜漢兩關開具實徵數目咨川劃抵如再

徵不足額卽著該關自行賠解又迭准部咨飭令各該關

各就實在情形按年溢解斷不引以爲據將溢解之數編

爲定額等因茲據布政使鹿傳霖詳查夔關每年應徵正

額盈餘銀一十八萬三千七百餘兩光緒五年分因驗放

上下水洋票照單未經劃除計短徵銀六萬六百餘兩已

據該府賠解足額至六年分應徵正額盈餘銀兩除宜漢

兩關徵收子口稅劃抵銀七萬一千九百餘兩外該關祇

應徵解銀一十一萬二千六百餘兩今據徵解銀一十三萬八千七百餘兩計多徵銀二萬六千餘兩又七年分連閏應徵正餘銀一十九萬六千餘兩除宜漢兩關徵收子口稅劃抵銀八萬六千餘兩該關祇應徵解銀一十一萬兩零今據徵解銀一十二萬三千餘兩計多徵銀一萬三千兩零綜計六七兩年共多徵銀三萬九千餘兩均分別詳解題報在案惟查近年自行洋票以來變稅之徵不足額雖由於洋票侵占過鉅然商販之偷漏恐亦不免屢經嚴飭認真稽查整頓期有起色不得收多報少該府尙能竭力遵辦藉得頻年溢解第以後能否豐旺仍難預料惟有責成該府實收實報有餘則儘數批解不足則照額賠

填應請仍照部議不以溢解爲例俾免歧誤等情詳請奏
咨前來臣覆覈無異除咨部外理合附片陳明伏乞
聖鑒訓示謹

奏

解部減成減平等款留川備撥摺

光緒八年八月三日

奏爲川省應解減成減平各銀兩暫請留撥各路餉需恭
摺具奏仰祈

聖鑒事竊查光緒八年正月初四日准戶部奏催各直省
欠解減平銀兩行令按照定章於每年二二八月埽數解部
黨有挪移拖延比照地丁錢糧完欠分數分別議處又於
五月十二日復准部咨以臣奏委解八年分頭批京餉及
固本兵餉案內指撥七年京平銀二萬兩作爲固本兵餉
以奏明解京之項不應再行動挪行令速籌抵補解部各
等因均經飭司遵辦去後茲據布政使鹿傳霖詳稱遵查
川省僻處西陲賦薄徭輕額征課稅入不敷出向來兵餉

臺費等項全賴鄰省協濟供支迨自軍興以來非惟鄰省不復協濟反由川省協濟而逐年解撥京外各餉及本省旗綠兵餉並防勦經費已不下六七百萬兩所賴以周轉者皆由勸辦津捐抽收釐金並將歷年扣收減成減平銀兩隨時通融挪湊勉強支持是以歷奉催提減平減成各銀兩均未能撥解絲毫光緒六年奉部續催復詳經奏請自光緒七年起將減平減成銀兩另款存儲解京以裕庫備原以京師爲根本重地自應盡力籌供詎奏報以後復奉添撥償款銀十六萬兩又加撥東北邊防經費銀六萬兩合之原撥京餉兵餉及各路協餉本省防費爲數加鉅待用尤急川省每歲進款不及四百萬兩而用款則有六

百數十萬兩有奇出入不敷已有確數可稽今入者已極
羅掘之術出者日有增鉅之憂實屬無從挹注萬不得已
始將七年減成減平各銀兩先爲通融劃解固本京饟及
西路協饟藉以顧全大局茲准咨催籌解本應遵辦無如
庫儲異常匱乏現實無款可籌兼之各路協饟欠解過多
委檄頻催均有迫不及待之勢若非權宜緩急酌量騰挪
則貽誤要需所關更鉅等情詳請奏咨前來臣查川省賦
稅原屬無多而撥解各項日益增劇頻年因庫儲竭蹙屢
請展辦津貼捐輸其艱窘情形早在

聖明洞鑒之中至減成減平各銀兩本係應解部庫之款
惟臣屢與藩司通盤籌畫奉撥京協各饟尤關緊要萬不

能分釐緩解與其勉符原奏貽誤饑需曷若據實直陳力
維大局合無仰懇

天恩俯念川省撥款日增准將養廉減成及各項減平銀
兩暫行留川備撥一俟各路協饑減少卽行遵照前奏按
年按數補解俾不致兼顧爲難並請

勅部將歷年完欠分數暫免核計出自

逾格鴻慈除咨部查照外是否有當理合恭摺稟陳伏乞

皇太后

皇上聖鑒訓示謹

奏

光緒八年九月三
十日

松潘等處短收餘茶息銀情形片

再查前准戶部咨以四川省松潘廳等處每年行銷餘茶給發照票收獲息銀六千餘兩滿城地租錢易銀四百四兩四分四毫一案行令將咸豐七年起歷年徵收餘茶票息及滿城地租等銀迅速按年造具清冊暨咸豐六年分應存前項銀十萬九千一百八十兩零是否實存在庫出結專案送部其該廳同知邱瑀完繳及折抵墊款銀兩亦卽敘入該年管收項下造報等因當經分行藩司鹽茶道迅速造報去後茲據鹽茶道崧蕃詳稱遵查此項照票起自乾隆二十三年前因城垣坍塌奏明借支院司養廉由鹽道印給照票飭發產茶州縣園戶茶商領本配茶繳息

以作修理城工之資二十六年卽經停止至二十七年復經前總督阿爾泰奏明照舊領行作爲城工及夷務賞需之費旋於三十六年追勦金川卽經停運迨至凱撤已配茶包霉爛以致前發成本歸於無著隨後又由灌茂等州縣茶商以茶園餘茶廢棄可惜情願自備成本領票照行徵息充公以作城工及夷務賞需之費此項茶票原無定額所徵息銀亦無定數因商人自出資本總視餘茶之多少以爲行票之等差時有盈餘短絀亦難苛責從前川省西南兩路口岸暢行每年可得息銀五六千兩至嘉慶年間南路夷岸疲滯兼以餘茶無多卽商歇業惟西路灌茂照行每年祇可收銀三千餘兩迨至咸豐九年川省軍興

十一年逆番倡亂松城失守久未克復岸失票停至同治
四年松城克復而灌商又早故絕歇業惟茂州一處商人
獨力支撐前任各鹽道於松城被擾後票停未發款無所
出歷年既久籌補維艱卽飭茂商行新代舊意在彌補前
此數年未行票項期歸有著詎知銷路旣滯產茶無多歷
年湊填萬難足數以致愈拖愈久舊年之應納旣難填補
而本年之新票復多停滯此二十餘年奏銷不能報部之
實在情形也該道到任責令代舊行新冀可彌補足額而
兩載以來竭力整頓查辦迭飭邛灌茶商照舊領行各商
均以樹老枝枯產茶短絀每年除配額引之外所贍餘茶
無幾兼之口外銷路疲滯屢催未據請領且川省茶園祇

有此數天地所生斷不能以人力使其踴躍所有兵燹後
未足之數欲其補足實所不能况此案係由商人自備成
本採配餘茶既非維正之供亦無准定額數若再操之過
急不但於政體未宜且恐於商情未協轉致裹足不前無
益有損該道逐項句稽除豁免已革前任松潘廳同知邱
瑀挪用咸豐七八兩年票息銀兩應請免造銷冊外其完
繳及墊款銀兩敘入管收項內結報今自咸豐九年起至
光緒六年止另造總冊移送藩司彙詳請銷等情請奏前
來臣查松潘廳等處餘茶票息收數短絀實因川省兵燹
後商人久未復業岸失銷滯所致至此項票息前存銀十
萬餘兩嗣因雷波廳夷匪滋擾借撥銀八萬八千四十兩

應行籌還以及應銷滿城地租錢文均係藩司撥發管理之款除飭催藩司趕緊分別查明按年造冊是否一併實存在庫出具切實印結另行送部外所有查明歷年短收餘茶息銀大概情形理合先行奏報伏乞

聖鑒訓示謹

奏

夔關應解督署公費照舊留支片

光緒八年十二月初六日

再四川夔關向章除額解正額盈餘及攤賠渝關木價等款外均定有本省各署及各地方辦公津貼暨攤捐各項多寡不等俱視公事繁簡爲等差內惟督署公費較優者以該關爲總督專司公務極多而總督又兼管巡撫尤增繁累故每年酌定解銀一萬二千兩而兩任中辦公丁役人等役食亦每年定給銀一千二百兩歷來無異臣光緒三年到川知此項公費爲督署向有之款而賦性迂拘向於公項不敢妄取此項雖係公費究屬私財是以決不取用分釐當時卽擬裁革嗣查川督歲支養廉銀一萬三千兩自經扣成減平再加攤本省捐款外每年所支僅八千

餘兩而總督又兼巡撫事以之辦公實不足用全賴該關
所解津貼通融挹注始能敷衍今規禮盡裁若再將公費
裁革在窮苦自甘者已覺竭蹙不遑設費用稍多之員必
至無以自給誠恐奢迫日甚別計營謀勢必變本加厲從
前川省各任於取用公費外仍照收規禮卽其明證臣再
四思維不敢以一己之淡泊貽後人之重累是以勉爲存
留惟裁之既不能取之又不可因見川省地大人衆窮苦
過多年終不乏應辦公事輒以無款中止時爲扼腕遂將
此項公費儘臣任內改解藩庫暫作餘款遇有地方要事
無法籌辦卽於此內動支所有數年來舉凡施濟貧苦資
助窮民幫補極苦州縣支應例差以及年中各項獎勵士

子賞恤兵丁暨此外來往駐藏差使費重難籌者津貼川資以免需索而於寅僚中有夙行自愛病故累深者亦於此中酌給以此連年辦理既不損公家一錢而於地方實多裨益至定給丁役役食一項臣亦未令收用仍諭其一律捐入地方以濟貧民該丁役等尙不以爲難均皆照辦此臣歷年中借此不費之惠稍得以辦理地方之實情也惟此項公費實督署萬不可少之需在臣任雖儘以辦公然斷不可援以爲據應仍照舊存留俾後來之員辦公有所挹注不致竭歷貽誤共飭廉隅以資表率是以後大法小廉悉賴

聖主砥礪成全之所致也所有夔關向解公費應請照舊

留解以資辦公緣由謹附片具陳伏乞

聖鑒謹

奏

倣照晉省清查庫款片

光緒九年正月二十九日

再臣准戶部咨御史梁俊奏請各省藩庫倣照晉省章程一律勒限設局清查一片光緒八年九月十一日奉

上諭前據張之洞奏請設局清查晉省庫款當經降旨准行茲據御史梁俊奏藩庫積弊恐不獨晉省爲然請勅各省將籌墊濫支撥抵借動隱匿等弊一律設局清釐等語各省庫備款項國帑攸關不容絲毫弊混歷年以來籌辦軍需善後等事款目繁多官非一任難保無前項情弊著各直省督撫倣照山西省清查章程將藩庫各款一律勒限清釐務當破除情面認真辦理以重帑項而清積弊至應放應緩各款尤宜隨時察核毋任稍涉含混欽此等因

咨行欽遵辦理當經轉行去後茲據布政使鹿傳霖詳稱
遵查川省司庫正雜各款自道光二十八年清查以後迄
今三十餘年咸豐同治以來初則籌濟鄰饑辦理變防繼
則本省軍興需餉益鉅騰挪挹注在在有之以致收支混
淆紛如亂絲幾至各款盈虛茫然莫辨各前司任內雖經
隨時清查不過一時一事該司去秋莅任隨卽澈底清釐
自道光二十八年清查竣事起逐款尋求底蘊趕將厯年
軍需用款及收支津貼捐輸鹽釐貨釐鹽稅等項分晰確
查應更正者更正應撥還者撥還正在上緊查辦間欽奉
上諭飭令倣照山西章程一體設局清查自應仍以道光
二十八年清查竣事起在於司署設局委員逐款窮究原

委接續前案凡牽涉軍需款項尤當力求核實庶期正本
清源條分縷晰一律澄清惟事越三十餘年款逾數千百
萬句稽核對事實繁難必須遴委明白諳練之員幫同逐
一澈查始克有濟請自光緒九年正月二十一日設局起
一體入局清查等情請奏前來臣查川省藩庫自道光二
十八年清查以後至今三十餘年款目紛繁收支牽混亟
應委員幫同清釐以昭詳晰除批司督同委員勒限認真
逐款清釐不准稍涉含混一俟事竣另行奏報外所有川
省設局委員清查庫款緣由理合附片陳明伏乞

聖鑒訓示謹

奏